

Ынакшылым
 чүрээнге
 шыгжа, сарыым.
Чылан маңгыс —
 дайзыны
 баскан соонда
Чылыг,
 чассыг куспаамга
 дыштаныр сен.

**СОВЕТ ЭВИЛЕЛИНИҢ МААДЫРЫ
МИХАИЛ АРТЕМЬЕВИЧ БУХТУЕВ**

Совет Эвилелиниң Маадыры Михаил Артемьевич Бухтуев 1925 чылдың ноябрь 23-те Тожу районунун Сыстыг-Хем аксындан ырак эвесте Кара-Хаш деп суур-жугашка төрүттүнгөн. Оолдун адазы Артемий Иванович Бухтуев Бий-Хемнеп сал бадырып, Кызылдың тудугларын ыяш материалдары-биле хандырып, хире-чергези-биле амыдырап, чурттап чораан. Сөөлүндө Артемий Иванович өөнүң ишти Раиса Семеновна болгаш уруглары-биле кады Хараалга көжүп келген.

Оолдун адазы чүгле сал даамалы эвес, харын багай эвес аңчы кижиге чораан. Ооң ол мергежилинге оглу Миша база хандыкшып, адазы-биле Хараал алдын уургайының чоок-кавызынга аңнап-дииннеп, адыгжынын баштайгы дадыгышыкынын алган.

Михаил Бухтуев Кызылда совет школаның 6-гы класын доозуп турда, 1941 чылдың июньда Ада-чурттуң Улуг дайыны эгелээн. Тываның бүгү-ле хоорай, суурларына улустун ополчен шерии тургустунуп эгелээн, дыка хөй оолдар, кыстар фронтуже чорударын дилээн патриотчу билдиришкиннерни болгаш рапорттарны бижип турган. Михаил Бухтуев школага өөрөнмишаан, ополченге кирип алгаш, шеригниң дайынчы белеткелин эртирип турган. 1942 чылда Сарыг-Сепке чурттап тургаш, часкы тарылганың түлүк өйү эртте бээрге, радист — электриктерниң түр сургуулунга киргеш, ону эки дооскан, а ол-ла чылдың күзүнүндө Михаил Артемьевич Бухтуев аныктарның революстуг эвилелиниң (аревэ) кезигүнү апарган.



1942 чылдың төнчүзүндө Михаил ада-иези-биле байырлашкаш, шериг албанынче чорупкан.

М. А. Бухтуев шериг албанын Челябинск областын В. Уфалей хоорайынга танк училищезинге эрттирип, танкының механик-чолаачызы деп атты алган. Михаил Бухтуев 1944 чылда фронтуга баргаш, акы-дунма Белоруссияның черин немец-фашистиг эжелекчилерден хостаарынга киржип, эрес-маадырлыгы-биле тулушкан.

М. А. Бухтуевтиң авазынга бижээн чагааларын болгаш өске-даа документиленерни мооң адаанда парладывыс.